

**Meeqqat atuarfianni, inuussutissarsiutinut, ilisimatusarfimmi il.il. ilinniartut ilitsoqqussaralugit kalaallisut oqaatsitik atorlugit inaarutaasumik misilitsittarnissaasa allatulluunniit misilitsittarnissaasa qanoq qulakkeerneqarsinnaanera pillugu apeqquyteqaat aallaavigalugu oqallisissiatut siunnersuut.**

(Inatsisartuni ilaasortaq Jens Napätök', Partii Naleraq)

**Akissuteqaat**

(Ilinniartitaanermut, Kultureqarnermut Ilageeqarnermullu Naalakkersuisoq)

Naalakkersuisut Inatsisartuni ilaasortaq, Jens Napätök', Partii Naleraq, qutsavigiumavaat apeqquyteqaat aallaavigalugu oqallisissiatut siunnersuutaa meeqqat atuarfianni, inuussutissarsiutinut, ilisimatusarfimmi il.il. ilinniartut allatulluunniit misilitsittarnissaasa qanoq kalaallit oqaasii atorlugit inunnut kalaallisut ilitsoqqussaralugu oqaasilinnut qulakkeerneqarsinnaanera pillugu oqallisissiaq aallaavigalugu oqallittoqarnissaanik siunnersuutaa pillugu.

Aallarniutigalugu Naalakkersuisut oqaatigiumavaat siunnersuuteqartoq isumaqatigigatsigu, oqaluuserisaq manna oqallisissaammat pisariaqartoq, Naalakkersuisullu piffissami sivisujaami oqaluuserisassamik matuminnga aallussisimmammata.

Siunnersuut aallaaveqarpoq kalaallisut oqaatsitta nunatsinni pisortatigoortumik oqaasiunerannik, pisortallu ingerlatsineranni sutigut tamatigut atorneqartussaanerannik, tamatumani aamma ilinniartitaanerni aammalu atuartitsinermi. Taamaattumillu qularnaassavagut uagut nunatsinni meerartatta inuusuttortattalu kalaallisut ilitsoqqussaralugu oqaaseqartut pitsaanerpaanik periarfissaqarnissaat. Naalakkersuisut eqqarsartaaseq tamanna isumaqatigaat.

Naalakkersuisut ilinniartitaanernik tullerriiarinerminni pingaartippaat sapinngisamik amerlanerpaat inuussutissarsiutissaminnut piginnaanngorsarlutik ilinniagaqartarnissaat. Ilinniartitaanernik aaqqissuussaanitsinni immikkoortuni tamani, atualernej sioqqullugu aamma meeqqat atuarfianni ingerlatsinermi, qaffasinnerusunik ilinniagaqarnermut, ilinniagaqartut tamarmik suliaminnik ingerlatsisarput tamanna isiginiarlugu. Ingerlaavartumik kinaassusitsinnik aamma oqaasitsinnik aallussinerup saniatigut, assersuutigalugu ilinniartitaanernik, ilinniartitseriaatsini aamma ilinniusiornerni, aammalu ataatsimut kulturitsinnik aallaaveqartumik isiginnilluni atuartitsinermi sumiluunniit, aaqqiissutissat ilagaat sapinngisamik meeqqat aamma inuusuttut ilinniagaqarnissaminnut pitsaanerusunik periarfissaqartinnissaat, sulilu amerlanerusut ilinniagaqartarnissaat, aamma meeqqat atuarfianni, inuusuttuaqqanut ilinniartitaanerni qaffasinnerusumillu ilinniartitaanerni ilinniartitsisunngortarumaartut eqqarsaatigalugit. Taamatut aaqqissuussinitsigut pilersissavagut periarfissat meerartatta inuusuttuarartattalu oqaatsitik atorlugit

atuartinneqarnissaannut, aamma ilinniartitsisussaqaarnissaat namminneq akunnerminni ineriartorsimasunik.

Naalackersuisut siunnersuuteqartoq isumaqatigaat sulissutigissagipput atuartut, ilinniagaqartut, assassornikkut ilinniagaqartut - lærlingit, - ilinniartitaanernilu ilinniakkaminnik ingerlatsisut allat nammineq oqaatsitik atorlugit soraarummeersinnaalernissaat anguniarlutigu. Tamanna anguniarlugu sulivugut, alloriarnernillu tigusuassaagut pisariaqartunik siunnerfigisatsinnut sammiveqartunik. Inuussutissarsiutinik ilinniartitaanerni assersuutigalugu ingerlaannartumik – toqqaannartumik nutserineq atorneqarsinnaavoq soraarummeersitsinermi soraarummeertup, censorip aamma soraarummeersitsisup akornanni, suliame susassaqaqartut tamarmik kalaallisut piginnaaneqareersimangikkaangata. Aamma atorneqarsinnaavoq immikkut oqaatsinik ilisimasaqartoq imaluunniit akunnermiliuttoq, nalorninartuni soraarummeersitsisumut ikiortaasinnaasoq, censori imaluunniit soraarummeersitsisoq, oqariaatsinik ajornakusoortunik imaluunniit taaguutinik immikkuullarissunik nalunartunillu nutserisinnaasoq.

Ilinniartitaanernut atatillugu teknologii ineriartortuarpoq, e-læringilu atorlugu periarfissat aamma internet iluaqutigalugu soraarummeersitsisarneq pitsaanerujartuinnartunik periarfissaqartitsileriartorput, atuartunut aamma ilinniagaqartunut oqaasitsigut iluaqutaasunik. Ullumikkut periarfissat tamakkua amerlasuut annertunerujartortumik iluaqutigineqalerput, kisianni suli pikkorinnerulersinnaavugut.

Pingaarnertut qaffasinnerusumik ilinniartitaanerni, aamma ilinniarnertuunngorniartunni soraarummeersitsisarnerit kalaallisut ingerlanneqarsinnaaneri suli tamakkiisumik neqeroortigineqarsinnaanngillat. Minnerunngitsumillu qaffasinnerusunik ilinniartitaanerni oqaatsit faginut tunngatillugu atorneqartut. Ilinniarnertuunngorniartunni pineqarput fagit assigiinngitsut 60-init amerlanerulaartut, ilinniarnertuunngorniartunit 300-nit amerlanerusunit aasat tamaasa fagini arlaqartuni oqaluttariarsorluni aammalu allattariarsorluni soraarummeerfigineqartartut, atuartitsinerillu amerlasuutigut danskisut ingerlanneqartarlutik. Akunnerit amerlasuut fagini amerlasuuni nutserinertalimmik ingerlattariaqartassapput, tamatumuunalu ilinniagaqartut inatsisitigut illersugaanerit nalorninartorsiortinneqalersinnaavoq.

Taamaattumik suliniutit pisariaqarput, ilinniartitaanerni assigiinngitsuni sulisussaqaarniarnikkut immitsinnut annerusumik pilersortunngoriartuaarnissarput aqqutissiuukkumallugu, oqaatsinik atuartitsinerminnaanngitsaq, kisiannili ingerlatsinermi tamarmiusuni. Amerlanerusut atuartitsinermi ilinniartitsinermilu ingerlatsisuulernissaannik anguniagaqarnerup saniatigut ingerlaavartumik ilitsoqqussaralugu oqaatsitta nukittorsartuarnissaat atornissaallu ilinniartitaanernut atatillugu pisuni tamani nukittorsassavarput.

Taamatut oqaaseqarluta Naalackersuisuni qilanaaraarput inimi maani soqutigintumik oqallinnissarput.